



Regulativ davart
la promoziun d'energias regenerablas
Aboliziun

M E S S A D I

dalla suprastanza communal a al cussegl da vischnaunca

Preziau signur president
Preziadas signuras cusseglieras
Preziai signurs cussegliers

Il 11 da fevrer 2005 ha il cussegl da vischnaunca approbau in regulativ davart la promoziun d'energias regenerablas. Cun quella disposiziun ha la vischnaunca vuliu contonscher il suadont intent (art. 1):

¹Quest regulativ regla las cumpetenzas dalla vischnaunca sil sector dalla politica d'energia.

²La vischnaunca promova cun mesiras specialas l'utilisaziun d'energias regenerablas (sco p. ex. energia solara, energia da biomassa, geotermica, vent, ventilaziuns survegladas) sco era il diever spargnus dall'energia.

³Sco muossavia survescha la carta d'energia dils marcaus e dallas vischnauncas che ha igl intent d'exequir a moda efficienta il program federal d'energia 2000, igl uorden federal davart tener schuber l'aria sco era il conclus federal davart il diever d'energia.

Quellas mesiras han giu in bien effect. Ellas han stimulau d'applicar energias regenerablas e cheutras evitar il diever d'energias fossilas. Igl agid finanziel dalla vischnaunca ha animau vischins e vischinas da construir indrezs da tala natira. Dapi l'introducziun dallas mesiras (emprem da schaner 2006) ein 45 damondas vegnidadas risguardadas e la vischnaunca ha concediu per quei intent 100'440 francs. Igl onn 2006 eis ei stau 6 cass cun in importo da frs. 13'134.40 e 2007 12 cass cun ina summa da frs. 28'748.55.

Nova situaziun

Quellas indicaziuns muossan, ch'ei ha duvrau in cert temps avon ch'ins ha fatg diever da quella nova tecnologia. Denton ei la situaziun semidada da rudien. Las energias regenerablas anflan adina dapli acceptanza. Ils cuosts per ils indrezs ein sereudci e l'investiziun sepaga. Ei drova perquei buca pli il sustegn finanziel per animar d'applicar quella nova tecnologia. Igl intent ei contonschius e la vischnaunca sa desister da quella promoziun.

Leutier vegn igl aspect finanziel. La vischnaunca ei obligada da spargnar e sa selubir da far mo las expensas ch'ei absolutamein necessarias. A vesta dalla situaziun semidada, vegnan las investiziuns en energias regenerablas era fatgas senza il sustegn dalla vischnaunca, perquei ch'ellas sepagan. Pia savein nus desister da quella promoziun. Quei duei succeder cun la fin digl onn 2009. Las damondas che vegnan inoltradas entochen ils 31 da december 2009 vegnan tractadas tenor il regulativ vertent. Las contribuziuns vegnan pagadas suenter ch'il stabiliment ei collaudaus e tenor il credit disponibel.

Energias regenerablas – la promoziun resta

L'applicaziun d'energias regenerablas resta – era senza il sustegn finanziel dalla vischnaunca – in postulat da muntada essenziala. La suprastanza communal beneventa era el futur grondamein l'applicaziun da talas energias. Quella finamira ei era francada en art. 71 dalla nova lescha da baghegiar, che secloma sco suonda:

Economia d'energia

art. 71

- 1 *La vischnaunca sustegn e promova l'applicaziun sistematica ed il diever d'energias regenerablas. Tier tuts baghetgs e tut las parts da baghetgs sto vegnir dau speciala atenziun che l'energia vegni utilisada a moda economica ed ecologica.*
- 2 *Ils detagls vegnan reglai separadamein entras igl organ cumpetent.*

Tier la tractaziun dallas damondas da baghegiar vegn l'istanza da baghegiar a dar gronda peisa sin l'applicaziun da mesiras per reducir il consum d'energia e per applicar energias regenerablas.

Dapresent prepara la Regenza ina nova lescha d'energia. Quella dat gronda peisa alla applicaziun dallas novas energias. Ella cuntegn numerusas prescripziuns en quella

direcziun. Denter auter vegn il sustegn finanziel dil Cantun rinforzaus. Ton pli savein nus desister da mesiras finanzialas communalas supplementaras.

Proposta

Sin fundament da quellas consideraziuns

p r o p o n a

la suprastonza communalal al cussegl da vischnaunca

d'abolir il regulativ davart la promoziun d'energias regenerablas per la fin digl onn 2009.

Suprastonza communalal Disentis/Mustér

Il president:



Dumeni Columberg

Il canzlist:



Andri Hendry

Disentis/Mustér, ils 8 d'october 2009